

## ALAHADY IV - PAKA - TAONA A



**« Lazaiko marina dia marina aminareo fa izaho no varavaran'ny ondry »**

Ry Kristianina havana, Alahady fahaefatra amin'ny Paka dia mahatsiaro manokana an'i Jesoa mpiandry ondry tsara isika, izy ilay mpiara-belona amintsika eo anivontsika, tsy lavitra atsika i Jesoa izay nitsangan-ko velona.

Vakiteny I : Asa 2, 14a. 36-41  
Tononkira : Sal. 117,  
Vakiteny II : 1 Pi. 2, 20b-25  
Evanjely : Jo. 10, 1-10

Ezahin' ny Eglizy ny mampianatra sy mampita amintsika mandritra ny Alahady rehetra fankalazana ny vanim-potoanan'ny Paka amin'ny alalan'ny litorjia izay fankalazantsika ny finoana ny maha eo akaikintsika an'i Jesoa Kristy izay nitsangan-ko velona. **Ny paka Alahady voalohany dia ankalazantsika an'i Jesoa nandresy ny ratsy**

: raha miara-dàlana sy miara-maty aminy isika dia handresy ny ratsy. Fantantsika fa maro ny ratsy ary ny farantampony dia ny fahafatesana. Manjaka izany ankehitriny satria tsy eo i Jesoa mpiara-dàlana amintsika, tsy eo eo anivontsika izy, izany no mahatonga ny fontsika "encombré", feno zavatra manakorontana eo amin'ny fiainana. Matetika adinontsika anefa fa i Jesoa nitsangan-ko velona anefa dia i Jesoa mpamindra Fo.

**Ny Alahady faharoan'ny Paka dia ankalazantsika an'i Jesoa mpamindra Fo** : i Md Tomà no azo lazaina fa nisolo vava atsika raha izy nilaza hoe "Tompoko sy Andriamanitra, izany tokoa i Jesoa miara-belona amintsika, Tompontsika sy Andriamanitsika izy izay mampianatra atsika.

**Ny Alahady fahatelon'ny Paka dia ankalazantsika an'i Jesoa Làlana sy Fahamarinana** : Nisehoan'i Jesoa sy niarahany làlana tamin'ireo mpianatra roa lahy avy any Jerosalema nankany Emaosy. Namakivaky ny herinandro masina isika ka tamin'izay naka lohahevitra hoe : "miara-miditra amin'i Jesoa ao Jerosalema isika". Izany hoe Jesoa nitsangan-ko velona mpiara-dia amintsika. Rakotra zavatra maro anefa ny masontsika tahaka an'ireo mpianatra tany Emaosy ka very fanahy mbola velona isika ary izay ny zava-misy ankehitriny tsy mahita an'i Jesoa isika nefa eo izy miara-dàlana amintsika. Ny tadiaviny dia isika hihaino azy, hihaino ny tenin'Andriamanitra.

Rehefa mihaino ny tenin'Andriamanitra isika ka mandray ny Eokaristia dia miova ny fiainantsika : mirehidrehitra ny fontsika, tsy "encombré" intsony fa feno hafaliana sy fiadanana ka mihazakazaka isika mankany Jerosalema izay tanànan'ny fiadanana dia tsy iza fa ny fianakaviansika Eglizy kely, ny Eglizy fiombonana, ny Eglizy iraka no hanambarantsika ny hoe "Jesoa fiadanana mampihavana atsika, mampiombona atsika", mihazakazaka isika manambara an'izany ary handray an-tànana ny Eglizy isika.

Amin'izao Alahady fahaefatra izao dia i Jesoa mpiandry ondry tsara no ankalazaintsika izay hahatsiarovantsika manokana ireo izay mpiara-dia sy manokana ny fiainany manontolo ho an'i Jesoa. Tsy midika akory izany fa ny lahika vita batemy tsy mpanara-dia azy, rehefa vita batemy isika dia mandray an'i Kristy eo anivontsika fa ireo pretra, ny eveka, ny papa sy ireo mpandraharaha rehetra no heverintsika ho mpiandry ondry tsara.

Tsy araky ny fomba fieritreretantsika hoe mpiandry ôndrikôndriky na tsy "magnaja" araka ny fomba fitenintsika aty avaratra. Magnaja i Jesoa ary nanolotra ny ainy izy, miombona amintsika izay ondriny tiany izy. Izany koa no andrasana amin'ireo izay nanolotra ny ainy ho mpiara-dàlana amin'i Kristy dia ireo pretra sy ny voatokana rehetra.

Koa izany no antony hivavahantsika manokana amin'ity andro anio ity ho an'ireo mpiandry ondry rehetra sady fomba iray koa entina hanampiana azy ireo ny mivavaka ho azy.

Nasaina ny fianakaviana ato amin'ny diosezy hanangana am-panahy pretra anankiray ka hivavaka ho azy manokana. Fomba mety hanampiana azy ireo koa ny fiasan-dôha amin'ny fomba hivelony izany "vocation" izany, tsy hoe sanatria isika indray no vato misakana tsy hahafahany mivelona izany tanteraka.

Maro ny fomba mety ataontsika hanampy azy ireo amin'izany, anisan'izany ny fijoroantsika eo anivon'ny Eglizy iraka, Eglizy fiombonana fa indrindra amin'ny Eglizy kely satria araka ny fitenintsika matetika hoe ny hazo no vanon-ko lakana ny tany naniriany no tsara.

Manararaotra aho misaotra anareo amin'ny ezaka ataonareo hanampiana an'ireo pretrantsika, an'ireo voatokana rehetra, any amin'ny seminera. Ireny no manaporofa fa Eglizy velona isika, Eglizy mivelona amin'ny finoana. Araka ny efa voalazantsika manome hasina ny finoako aho mba handraisako ny fahasovana.

**Maninona tokoa moa isika mivavaka manokana ho an'ny pretra ?** ny pretra no manao ny Eokaristia, ny fisian'ny Eokaristia no mamelona ny Eglizy ka tsy mahagaga isika raha manohana azy tanteraka ka isaorako anareo. Ny tsodranon'Andriamanitra hitantana atsika. Enga anie hitohy sy ho mafimafy kokoa hatrany izany fanohanantsika ireo mpiandry ondrintsika izany ary dia mivavaka manokana ho an'ireo mpiandry ondry izay nantsoin'Andriamanitra hanompo anareo, mila vavaka satria fantatrareo ilaina tahaka ny voalazan'i Md Piera ao amin'ny vakiteny voalohany : "*Ireo mpiandry ondry tsara hanambara amin'ny fiainany manontolo fa i Jesoa no mpamonjy, i Jesoa no mitondra atsika amin'ny tena fiainana, hahafahan'ny olona hilaza inona ary no ataonay ?*" Izany no hafaliana ho anay mpiandry ondry tsara raha misy manontany inona no ataonay mba hahazo ny famonjena ?

Milaza i Md Piera : mibebaha ! izany no vokatry ny fiainana manambara izany famonjena izany, andrasana amin'izao taona fandalinam-pinoana izao, tsy hoe ny pretra fotsiny fa isika kristianina koa voaantso mampitraotra ny finoana sy ny fiainana andavanandro ka hilaza "inona ny ataonay". Tsy inona ny atao fa mibebaka ka miala ny "encombement" ao am-po ka mametraka an'i Jesoa mpiara-belona ho tompon'ny Fo, ho "chapelle" ny famindram-po eo anivon'ny fiainantsika andavanandro.

Izany no mbola antintraterin'i Md Pier : raha "chapelle" famindram-po isika tsy amin'ny alalan'ny kobaka ambava fotsiny fa amin'ny alalan'ny fiainantsika manasoa ny hafa.

Ny mpiandry ondry tsara dia manao soa ho atsika, manolotra ny ainy izy, manasa ny tongontsika izy, nanaiky ho mpanompo, io no toetran'ny mpiandry ondry tsara.

Andrasana amintsika tsirairay avy ireo toetra ireo ka na izay lavitra aza dia lasa akaiky tokoa, ho sitrana ireo aretina mikiky ny fiainantsika.

Ry Jesoa Tompo ô, ianao tokoa ny mpiandry ondry tsara ka enga anie noho ny fitiavanao anay, izahay koa ho vonona hanolotra ny ainay ho an'ireo manodidina anay. Enga anie izahay koa ho vonona hanasoa ny hafa, ho vonona hijoro hanambara anao, hanambara ny marina. Enga anie noho ny fahasoavanao ireo mpanara-dia anao akaiky izay tsaroanay manokana ny mivavaka ho azy ireo amin'ny Alahadin'ny faha-4 ny Paka izao, mivavaka ho azy ireo izahay, mivavaka ho an'ny Papa Ray masina, izy no solon-tenanao eto anivonay, enga anie ho hitanay tokoa ny maha-mpiandry ondry tsara azy. Enga anie ny ezaka ataony hitarika ny vahoaka mba ho tantanin'ny fahasoavanao mandrakariva.

Mivavaka ho an'ireo eveka, ny pretra, ny voatokana, mahatsiarao koa ny fianakaviana "ny hazo vanon-ko lakana , ny tany naniriany no tsara", enga anie mba ho fianakaviana misy an'Andriamanitra ny fianakavianay ka hahatonga anay ho "chapelle"ny famindram-po velona eo amin'ny fiainanay andavanandro. Amen

